

Pagpangandam alang sa Kinatibuk-ang Komperensiya

Sa dihang si Jesukristo mibisita sa mga Nephite, Siya midapit kanila sa pag-andam sa ilang mga hunahuna sa pagpaminaw ug pagsabot sa Iyang mensahe (tan-awa sa 3 Nephi 17:3). Handurawa kon unsa kaha ang imong kasinatian sa kinatibuk-ang komperensiya kon imo usab kining buhaton.

1. Tun-i ang mosunod nga mga kapanguhaan, mangita og mga paagi nga maandam nimo ang imong kaugalingon sa pagdawag sa mga mensahe sa Ginoo sa kinatibuk-ang komperensiya. Mahimo nimong markahan ang makahuloganon nga mga pulong ug mga hugpong sa mga pulong nga mipatigbabaw diha kanimo.

Mosiah 2:9; Doktrina ug mga Pakigsaad 88:63

Si Presidente Russell M. Nelson mitudlo:



Gikan sa pulpito karon ug ugma, kamo padayon nga makadungog og kamatuoran. Palihog timan-i ang mga ideya nga makakuha sa inyong pagtagad ug kadtong mosantop sa inyong hunahuna ug magpabilin sa inyong kasingkasing. Mainampoon nga mohangyo sa Ginoo sa pagkompirmar nga unsay inyong nadungog mao ang tinuod. (Russell M. Nelson, “Unsa Ang Tinuod?,” Liahona, Nob. 2022, 30)

Si Presidente Henry B. Eyring sa Unang Kapangulohan mitudlo:



Nakaila ko sa mga sulugoon sa Dios kinsa mamulong kaninyo niining komperensiya. Gitawag sila sa Dios sa paghatag sa mga mensahe ngadto sa Iyang mga anak. Ang Ginoo naghigot kabahin nila: “Unsa nga Ako ang Ginoo namulong, Ako namulong, ug Ako dili mangayo og pasaylo alang sa akong kaugalingon; ug bisan pa ang mga langit ug ang yuta mahanaw, ang akong mga pulong dili mahanaw, apan ang tanan matuman, bisan pinaagi sa akong kaugalingon nga tingog o pinaagi sa tingog sa akong mga sulugoon, kini managsama ra” [Doktrina ug mga Pakigsaad 1:38].

Kamo nagpakita sa inyong pagsalig Kaniya kon kamo maminaw uban sa tinguha sa pagkat-on ug paghinulsol ug dayon moadto ug mobuhat sa bisan unsay Iyang gihangyo. Kon kamo igo nga mosalig sa Dios sa pagpaminaw sa Iyang mensahe sa matag pagpamulong, awit, ug pag-ampo dinhi niini nga komperensiya, makaplagan ninyo kini. Ug kon kamo dayon moadto ug mobuhat sa unsay gusto Niyang ipabuhat kaninyo, ang inyong gahom sa pagsalig Kaniya motubo, ug moabot ang panahon nga kamo mapuno sa pagpasalamat nga masayod nga Siya misalig kaninyo. (Henry B. Eyring, “Salig sa Dios, Dayon Lakaw ug Buhata,” Liahona, Nob. 2010, 73)

Si Presidente Dieter F. Uchtdorf, kanhi sa Unang Kapangulohan, mitudlo:



Samtang nangandam kamo alang sa kinatibuk-ang komperensiya, dapiton ko kamo sa pagpamalandong sa mga pangutana nga gusto ninyong matubag. Pananglitan, tingali nangandoy kamo alang sa direksiyon ug giya sa Ginoo kalabot sa mga hagit nga inyong giatubang.

Ang mga tubag sa inyong piho nga mga pag-ampo mahimong direktang moabot gikan sa usa ka partikular nga pakigpulong o gikan sa piho nga hugpong sa mga pulong. Sa laing mga higayon ang mga tubag mahimong moabot gikan sa mora og walay kalabotan nga pulong, hugpong sa mga pulong, o awit. Ang kasingkasing nga napuno sa pasalamat alang sa mga panalangin sa kinabuhi ug ang dakong tinguha sa pagpaminaw ug pagsunod sa mga pulong sa tambag moandam og agianan alang sa personal nga pagpadayag. (Dieter F. Uchtdorf, “Kinatibuk-ang Komperensiya—Dili Ordinaryo nga Panalangin,” Liahona, Sept. 2011, 4)

2. Gikan sa imong gitun-an, paghimo og lista sa mga paagi nga makaandam ka sa pagpaminaw sa tingog sa Ginoo sa kinatibuk-ang komperensiya.
3. Paglista og uban pang mga paagi nga makapangandam ka sa pagpaminaw sa tingog sa Ginoo sa kinatibuk-ang komperensiya.